

Na osnovu člana 13. Zakona o organizaciji i nadležnostima kantonalnih organa uprave i upravnih organizacija ("Službeni glasnik Unsko-sanskog kantona", broj: 20/21 i 13/24), i člana 48. stav (2) Zakona o izvršavanju Budžeta Unsko-sanskog kantona za 2025. godinu ("Službeni glasnik Unsko-sanskog kantona", broj: 1/25), a na osnovu Odluke Vlade Unsko-sanskog kantona broj: 03-02-51-853/2025 od 05.09.2025. godine, Ministarstvo obrazovanja, nauke, kulture i sporta raspisuje:

JAVNI POZIV

za predlaganje i odabir projekata tekućeg granta – Grant za mlade, koji će se sufinansirati iz Budžeta Unsko-sanskog kantona u 2025. godini

Član 1.

Sredstva tekućeg granta – Grant za mlade za 2025. godinu dodijeljivat će se u skladu sa Odlukom Vlade Unsko-sanskog kantona broj: 03-02-51-853/2025 od 05.09.2025. godine o utvrđivanju kriterija, uslova i postupka za dodjelu sredstava tekućeg granta – Grant za mlade za 2025. godinu.

Član 2.

Pravo prijave na ovaj Javni poziv imaju organizacije, udruženja, mediji i druga pravna lica koja nemaju status javne ustanove, a obavljaju djelatnost i implementiraju programe i projekte od interesa za mlade na području Unsko-sanskog kantona, registrovana kod nadležnog Ministarstva Unsko-sanskog kantona, kao i neprofitne organizacije koje su registrovane u skladu sa federalnim zakonima, kao i zakonima Bosne i Hercegovine, a koji djeluju i provode aktivnosti projekata na području Unsko-sanskog kantona.

Član 3.

Sredstva se dodjeljuju za projekte od interesa za mlade koji se odnose na:

- a) rad, zapošljavanje i poduzetništvo mladih;
- b) obrazovanje i edukaciju mladih;
- c) socijalnu brigu o mladima;
- d) sigurnost mladih;
- e) kulturu i sport mladih;
- f) aktivizam (učešće, volontiranje i mobilnost) mladih.

Član 4.

Odabir programa i projekata vršit će se u skladu sa usvojenim općim i posebnim kriterijima.

1. Opći kriteriji koji se primjenjuju na sve korisnike predviđenih sredstava su sljedeći:

- a) da se projekt implementira na području Unsko-sanskog kantona i u interesu mladih Unsko –sanskog kantona;
- b) da su originalni, zanimljivi i korisni projekti koji podstiču mlade da se uključe i budu

- aktivni članovi zajednice u kojoj žive;
- c) da su projekti koji odgovaraju lokalnim potrebama i imaju utjecaj na lokalnu zajednicu, njene stanovnike, prirodne i kulturne resurse, kao i zaštitu životne sredine;
 - d) da potiču mlade na demokratiju, toleranciju i ravnopravnost spolova, promovisanje volonterizma i timskog rada;
 - e) da su projekti koji se odnose na kreativno izražavanje (književnost, likovna umjetnost, pozorište, muzika, ples, umjetnička fotografija, film, sport i sl.);
 - f) da su projekti od utjecaja na prevenciju ovisnosti i promociju zdravog života, sporta i sl.

2. Posebni kriteriji za programe i projekte mladih su:

- a) programi i projekti koji afirmišu aktivnosti na organizacionom jačanju asocijacija i organizacija mladih;
- b) kvalitet kandidiranih programa i projekata, dugogodišnji kontinuitet i značaj za širu društvenu zajednicu;
- c) programi koji afirmišu stvaralaštvo i učešće mladih na kongresima mladih, smotrama i takmičenjima u oblasti kulture, sporta, aktivizma, volonterizma i tehničke kulture;
- d) edukacijski programi koji pospješuju aktivnosti, razvijanje organizacijskih sposobnosti i učešće mladih u javnom životu;
- e) dosadašnji uspjesi na domaćem i međunarodnom planu;
- f) podrška programima i projektima, koji imaju podršku lokalne zajednice i osigurano sufinansiranje;
- g) programi i projekti asocijacija i udruženja koja u svojim upravljačkim strukturama imaju 2/3 mladih (član 4. Zakona o mladima FBiH „Službene novine Federacije BiH“ broj 36/10);
- h) programi i projekti čija su ciljna grupa mladi (od 15 do 30 godina starosti);
- i) programi i projekti medijske promocije tema i aktivnosti od značaja za mlade;
- j) programi i projekti asocijacija i udruženja kantonalnog nivoa.

Član 5.

- (1) Prije donošenja konačne odluke o odabiru, Komisija zadržava pravo zatražiti dodatna pojašnjenja projekta od aplikanta.
- (2) Preliminarna lista aplikanata koji ispunjavaju uvjete Javnog poziva sa brojem bodova, kao i lista sa nepotpunim i neblagovremenim prijavama objavit će se na službenoj web stranici Vlade Unsko-sanskog kantona (www.vladausk.ba).
- (3) Aplikanti koji se ne nalaze na preliminarnoj rang-listi čiji programi i projekti ispunjavaju uvjete Javnog poziva, imaju pravo podnošenja prigovora ministru Ministarstva u roku od 3 (tri) dana od dana objave preliminarne rang-liste na službenoj web stranici Vlade Unsko-sanskog kantona.
- (4) Odluka o prigovoru je konačna.

Član 6.

- (1) Podnosioci zahtjeva dostavljaju sljedeću dokumentaciju kako bi dokazali ispunjavanje uslova:
 - a) Prijavni obrazac (Obrazac I), elektronski popunjen, potpisan i ovjeren pečatom,

dostupan na službenoj web stranici Vlade Unsko-sanskog kantona;

- b) Rješenje o upisu u Registar udruženja kod Ministarstva pravosuđa i uprave Unsko – sanskog kantona ili drugog nadležnog organa u Federaciji Bosne i Hercegovine ili Bosne i Hercegovine iz kojeg je vidljivo sjedište udruženja na području Unsko-sanskog kantona i djelatnosti usmjerene na oblast od interesa za mlade ili za pravna lica Rješenje o upisu u sudski registar;
 - c) Uvjerenje o poreznoj registraciji, odnosno ID broj (izdaje Porezna uprava KPU Unsko-sanskog kantona);
 - d) Potvrdu banke u kojoj je navedeno da račun nije blokiran, broj transakcijskog računa i ID broj aplikanta, te karton deponovanih potpisa iz banke osoba odgovornih za finansije;
 - e) Finansijski plan programa/projekta tj. plan utroška budžetskih sredstava po stavkama koji je potrebno dostaviti na propisanom obrascu (Obrazac II) (za svaku stavku nabavki u budžetu projekta veću od 2.000,00 KM potrebno je priložiti predračun);
 - f) Ostala dokumentacija kojom se dokazuje ispunjavanje uvjeta iz člana 4. ovog Javnog poziva.
- (2) Svi dokumenti se prilažu u originalu ili ovjerenoj kopiji koja **ne smije biti starija od tri (3) mjeseca** računajući od dana objavljivanja Javnog poziva.

Član 7.

- (1) Prijava za dodjelu sredstava odnosno finansiranje/sufinansiranje projekata, posebno za svaki predloženi projekat, podnosi se na posebnom obrascu (Obrazac I) koji se preuzima sa stranice Ministarstva www.vladausk.ba, ovjerenom i potpisanom od strane odgovorne osobe i koji mora sadržavati:
- a) informacije o podnosiocu projekta (naziv aplikanta, odgovorna osoba, kontakt osoba za realizaciju projekta, adresa, broj telefona, e-mail)
 - b) naziv projekta (ne više od 8 riječi),
 - c) lokaciju implementacije projekta,
 - d) ukupan budžet projekta i izvore finansiranja,
 - e) sažetak projekta,
 - f) opći cilj i specifične ciljeve projekta,
 - g) relevantnost projekta,
 - h) očekivane rezultate,
 - i) projektne aktivnosti po fazama i vremenski okvir,
 - j) održivost projekta,
 - k) partnere na projektu (ukoliko ih ima),
 - l) budžet projekta (Obrazac II),
 - m) detalje o sufinansiranju (ukoliko postoje vlastiti ili drugi izvori finansiranja)
 - n) opis organizacije aplikanta,
 - o) broj transakcijskog računa i naziv banke kod koje je otvoren račun.
- (2) Svi aplikanti po Javnom pozivu mogu dostaviti samo jedan projektni prijedlog.

Član 8.

- (1) Obrazac za prijavu projekta sa budžetom i obavezna dokumentacija trebaju biti dostavljeni na način da su isti uvezani, numerirani i poredani prema redoslijedu iz člana 6. ovog Javnog poziva (numerira se svaka stranica redom i moraju biti uvezane u cjelinu).

- (2) Obrazac za prijavu (Obrazac I) mora biti potpisan i ovjeren.
- (3) Ukoliko aplikant ne postupi po naprijed navedenom, prijava neće biti uzeta u razmatranje i smatrat će se formalno-pravno neispravnom.
- (4) Projekti se dostavljaju u zatvorenoj koverti (A4 format) sa naljepnicom na koverti (dostupna na web stranici Ministarstva: www.vladausk.ba „Naljepnica za kovertu“).

Član 9.

Neće se uzeti u razmatranje prijave aplikanta dostavljene po Javnom pozivu:

- a) koje su neblagovremene (dostavljene nakon proteka roka određenog Javnim pozivom),
- b) koji ne dostave kompletnu dokumentaciju koja se traži Javnim pozivom,
- c) koji dostave projekte usmjerene na oblasti suprotno onim koje su određene u Javnom pozivu,
- d) koji ne dostave projekat u skladu sa članom 7. ovog Javnog poziva,
- e) koji za svaku stavku nabavki iz Budžeta projekta veću od 2.000,00 KM ne prilože predračun,
- f) koji u Obrascu II u koloni „opis troška“ ne specificiraju vrstu troška, već navedu uopćen opis troška iz kojeg komisija ne može jasno utvrditi preciznu namjenu utroška sredstava,
- g) koji su u prethodnim godinama dobili sredstva od ovog Ministarstva, a nisu ispunili obavezu pravdanja i izvještavanja,
- h) čiji administrativni troškovi (režije, telefonski troškovi, uredski materijal, bankovni troškovi, usluge knjigovodstvenog servisa, najam ureda i slično) na projektu prelaze 30 % ukupnog budžeta projekta.

Član 10.

(1) Svi zainteresirani aplikanti koji ispunjavaju uslove tražene ovim Javnim pozivom svoje programe/projekte, dostavljaju neposredno putem protokola ili preporučeno putem pošte na adresu: Ministarstvo obrazovanja, nauke, kulture i sporta Unsko-sanskog kantona, Alije Đerzeleza br. 2, 77000 Bihać, uz obaveznu naljepnicu za kovertu, s naznakom „Prijava na Javni poziv za predlaganje i odabir projekata tekućeg grant – Grant za mlade za 2025. godinu“.

(2) Rok za podnošenje prijave je petnaest (15) dana od dana objave Javnog poziva.

Broj: 10- 11-9942-4/25
Bihać, 12.09.2025. godine

